



ԱՐՓԵՆԻԿ ՂԱԶԱՐՈՍՅԱՆ

Պատմական գիտ. թեկնածու, ՄՄ, ՍՎԴ

ՀԱՅՐԱՎԱՆՔԻ ԳՐԶՈՒԹՅԱՆ ԿԵՆՏՐՈՆԸ

Հայրավանքը, որը հայտնի է նաեւ Հայր Հովհաննու վանք, Այրիվանք, Աղավնու վանք եւ Մարդաղավնյաց Սուրբ Նշան անուններով, Գեղարքունիքի նշանավոր վանքերից է։ Կառուցվել է Հայրավանք գյուղից հյուսիս-արեւելք՝ Սեւանա լճի հարավային ափի մի հրվանդանի վրա։ Հայրավան եւ Աղկալա (Բերդկունք) գյուղերը հիմնվել են ավելի հին, ընդարձակ մի բնակավայրի տեղում, որը, Սիրմեոն կաթողիկոսից սկսած, ուսումնասիրություններում անվանվում է «Ազատ քաղաք»¹։ Թեեւ վանական համալիրը երեք կողմից Սեւանա լճի ջրերով է շրջապատված, այդուամենայնիվ, համալիրի շինություններն ավելի անառիկ դարձնելու նպատակով չորս կողմից կառուցվել են ամուր պարիսպներ։ Համալիրի պաշտպանական այս կառույցները ոչ միայն ապահովում էին մենաստանի խաղաղ գործունեությունը, այլեւ պայմաններ ստեղծում հոգեւոր-մշակութային լիավուն, անխափան գործունեության համար։

Գրավոր աղբյուրներում վանական համալիրի կառուցման, միաբանությունից հաստատման, ինչպես նաեւ տեղի միաբանների հոգեւոր-մշակութային գործունեության վաղ շրջանի մասին ոչ մի տեղեկություն չկա։ Հայր Հովհաննու վանքն աղբյուրներում առաջին անգամ հիշատակվում է 1530 թ. մի ձեռագրի հիշատակարանում²։ 1648 թ. ձեռագրի հիշատակարանում նշված է, որ վանքը մտնում է Մազազա գավառի մեջ³։ Ավելի ուշ՝ 1711 թ., Հայրավանքը հիշվում է Սիրմեոն Երեւանցու «Ջամբու»-ում՝ Աղց,

¹ ՍԻՄԵՈՆ Ա. ԵՐԵՒԱՆՅԻ, Ջամբու, Վաղարշապատ, 1873, էջ 284. ՅՈՎՀ. ՇԱՀԽԱԹՈՒՆՅԱՆ, Ստորոգութիւն կաթողիկէ էջմիածնի եւ հինգ գաւառացն Արարատայ, հտ. Բ., էջմիածին, 1842, էջ 242. ՄԵՍՐՈՊ ԱՐՔ. ՍՄԲԱՏՅԱՆՅ, Տեղագիր Գեղարքունի ծովազարդ գաւառի, որ այժմ նոր Բայազիտ, Վաղարշապատ, 1895, էջ 433, 438. Հ. ՂԵՒՈՆԴ ԱԼԻՇԱՆ, Սիսական, Վենետիկ, 1893, էջ 410։

² ՏԵՆ Հ. ՂԵՒՈՆԴ ԱԼԻՇԱՆ, նշ. աշխ., էջ 141։

³ ՏԵՆ ՄՄ Հմր 4064, էջ 421ա. հմտ. «Ժէ. դարի հիշատակարաններ», մասն Գ., կազմեց՝ Վ. Հակոբյան, Երեւան, 1964, էջ 279։

Հայոց թառ, Կեչառիս, Բջնի, Գետարգելաց Սուրբ Նշան միաբանությունների շարքում⁴:

Երբեմնի մեծ վանական համալիրից այժմ կանգուն են մնացել եկեղեցին եւ գավիթը: Եկեղեցին քառակամար (քառաբսիդ), կենտրոնագմբեթ, խաչածեւ հատակագծով, միախորան կառույց է: Պատերին եղած հինգ արձանագրություններից եւ ոչ մեկում չկան վանքի հիմնարկերից տեղեկություններ: Գավթի արձանագրությունների մեջ եւս բացակայում է վերջինիս կառուցմանը վերաբերող վիմագիրը: Ուստի ուսումնասիրողները, ելնելով եկեղեցու եւ գավթի կառուցման ճարտարապետական, շինարարական առանձնահատկություններից, իրավացիորեն եկեղեցին համարում են Թ.—Ժ. դարի, իսկ գավիթը՝ ԺԲ.—ԺԳ. դարի Սյունյաց ճարտարապետական դպրոցի կառույցներ⁵:

Եկեղեցու ամենավաղ վիմագիրը 1211 թվականի է: Արձանագրությունը վկայում է, որ Հայրավանքի երկու առաջնորդները՝ Հովսափն ու Ներսեսը, աջակից ունենալով Գեղարքունիքի իշխան սպարապետ Բուբային⁶, միաբանների ու գյուղացիների օգնությամբ նորոգել են եկեղեցին: Բացի նորոգմանը նյութապես օժանդակելուց՝ սպարապետը, միաբանության ծախսերը հոգալու համար, Հայր Հովհաննու վանքին նվիրաբերել է այգիներ Ոսկեբակից, առուներ Քանաքեռից եւ երկու ջրաղաց Նորաշիկից⁷:

Տաճարի հարավային մուտքի վերնասեմի (բարավոր) վրա կա ուսումնասիրողների կողմից իրավամբ նույն ժամանակով թվագրվող մի արձանագրություն: Այն վաստակաշատ գիտնական Սեդրակ Բարխուդարյանը «Դիվան»-ում հրատարակել է այսպես.

ԵՍ ՍԱՐԳՍՈՒԿ ԵՒ ԲԱՀՐ ՇԻՆԵՑԱՔ :Բ: ԽՈՐԱՆ
ԵՍ ՎԱՀՐԱՄ, ՍՏԵՓԱՆՈՍ, ՄԻՈՒՆԱ, ԽԱԶԱՏՈՒՐ/
ՄԽԻԹԱՐԻԶՔ ՏՎԱՔ ՅԱԽԱՆ ԶՊԱՏՈՎԻ ՏԵՂԻՆ ՅԱ/

⁴ Տէս ՍԻՄԵՈՆ Ա. ԵՐԵՒԱՆՅԻ, նշ., աշխ., էջ 284:

⁵ Տէս ՍՏ. ՄՆԱՅԱԿԱՆՅԱՆ, Հայկական ճարտարապետության Սյունիքի դպրոցը, Երեւան, 1960, էջ 16. Ա. ԲԱՐԽՈՒԴԱՐՅԱՆ, Դիվան հայ վիմագրության, Գեղարքունիք, պրակ IV, Երեւան 1973, էջ 67 (№261). Ա. ՄԱՆՈՒԶԱՐՅԱՆ, Քննություն 4—9-րդ դարի շինարարական վավերագրերի, Երեւան, 1977, էջ 113:

⁶ Այս իշխանաց իշխանի անունն Աճառյանը հիշում է Բուպա ձեռով («Հայոց անձնանունների բառարան», հտ. Ա., Երեւան, 1942). այլ տարբերակներ տես Գ. ԳՐԻԳՈՐՅԱՆ, Պատրոն տերմինը միջնադարյան հայ աղբյուրներում, «Հայոց պատմության հարցեր», գիտական հոգ-վածների ժողովածու, 6, Երեւան, 2005, էջ 157:

⁷ Տէս Ա. ԲԱՐԽՈՒԴԱՐՅԱՆ, նշ. աշխ. էջ 69 (№261):

ԻԱՆԱՓՈՍ Ի ՎԱՆՔՍ ԵՒ ԱՌԱՋՆՈՐԴ ՍՈՐԱ ՅՈՎԱՍԱՓՆ/
ԵՒ ՆԵՐՍԷՍ ՏՎԻՆ ՄԵՋ Ի ՄԱՐԴՆ/ Ա ԺԱՄ Ի ՍԲ ԽԱԶԻՆ ՈՐ ԶԵԳԻՆ Ի ՎԱ-
ՆԻՅՍ ՀԱՆԷ ՅԱՅ ՆՁՈՎԵՍՅԻՑ:

Այս վավերագրում միախորան եկեղեցում երկու խորանների շինության մասին տեղեկությունը գիտնականների շրջանում առաջացրել է տարակարծություններ եւ տարբեր ենթադրությունների պատճառ դարձել:

«Քանի որ եկեղեցին մի խորան ունի, եւ այն էլ այդ նորոգումների ժամանակ է կցվել եկեղեցուն, ուրեմն երկրորդ խորանը վերաբերում է գավթին, իսկ գավթի խորանները կցորդ չեն, այլ հիմնական շինության մաս», — գրում է Ս. Բարխուդարյանը⁹: Արձանագրության մեջ հիշատակվող «երկու խորանները» գավթի արեւելյան կողմի երկու սենյակներն է համարում Ալեքսանդր Մանուչարյանը¹⁰:

Կարծում ենք, որ գավթի, առավել եւս գավթին կից սենյակները խորան չեն. Սարգիսուկի եւ Բահր վարպետների կառուցած երկու խորաններից մեկը Հայր Հովհաննու վանքի եկեղեցու խորանն է, իսկ մյուսը՝ մեկ այլ եկեղեցու: Այս ենթադրության համար կարելու կռվան է, եւ գուցե ապացույց, այդ նույն առաջնորդների մեկ այլ արձանագրությունը («Դիվան», թիվ 266): Այն գավթի հարավային պատին է: Չնայած այսօր մեզ հասած վիմագրի բավական եղծվածությանը՝ ընթեռնելի հատվածում արձանագրվում է մի շատ կարելու փաստ, ըստ որի՝ Հովասափ եւ Ներսես միաբանները «շինել» են՝ կառուցել կամ նորոգել են մի եկեղեցի եւ գավթի:

ԿԱՄԱԻՆ ԱՅ ՄԵՔ ԵՂԲԱՐՔՍ ՆԵՐՍԷՍ ԵՒ ՅՈՎԱՍԱՓ/
ՇԻՆԵՅԱՔ ԶԵԿԵՂԵՅԻՍ ԵՒ ԶԳԱԽԹՍ... ԱՅԳԻ /ԶԱՂԱՅԱՆԻ ԵՒ ...ՄԻԱ-
ԲԱՆՂՔՍ ՍԱՀՄԱՆԵՅԻՆ /ՊԱՏԱՐԱԳ Ի ՏԱԻՆԻ ԾԱՌՁԱՐԴԱՐԻՆ :Բ: ՆԵՐՍԻՍԻ/
ԵՒ :Բ: ՅՈՎԱՍԱՓԻՆ: ՈՎ ԽԱՓԱՆԷ ԴԱՏԻ ՅԱՅ¹¹:

⁸ Անդ (թիվ 269): Այս արձանագրությունը կրճատումներով հրատարակել են Ս. Զալալյանը (Ճանապարհորդություն ի Մեծն Հայաստան, մասն Բ., Տփլիս, 1858, էջ 136), Հ. Ղեւոնդ Ալիշանը, (նշ., աշխ., էջ 41), Մ. արք. Սմբատյանը (նշ. աշխ., էջ 435) եւ Ե. Լալայանը («Ազգագրական Հանդէս», գք. XXIII, էջ 140):

⁹ Ս. ԲԱՐԽՈՒԴԱՐՅԱՆ, նշ. աշխ., էջ 68:

¹⁰ ՏԵՍ Ա. ՄԱՆՈՒՋԱՐՅԱՆ, նշ. աշխ., էջ 113:

¹¹ Ս. ԲԱՐԽՈՒԴԱՐՅԱՆ, նշ. աշխ., էջ 71:

Այս վավերագիրը եւս անթվական է, սակայն հրատարակիչը ենթադրում է, որ 1211 թվականից մի քանի տարի հետո պետք է գրված լինի եւ վերաբերում է եկեղեցու եւ գավթի նորոգմանը¹²:

Համեմատելով եկեղեցու հարավային մուտքի վերնասեմի արձանագրությունը (ավելի վատ պահպանված) եւ նույն արձանագրության՝ «Դիվան»-ում հրատարակված գծագրային վերծանությունը, ինչպես նաեւ արձանագրության լուսանկարը՝ Սարգսուկի վիմագիրը կարողում ենք այսպես.

ԵՍ ՍԱՐԳՍՈՒԿ ԵՒ ԲԱՀՐ ՇԻՆԵՑԱՔ :Բ: ԽՈՐԱՆ
ԵՍ ՎԱՀՐԱՄ ՍՏԵՓԱՆՈՍ ՄԻՈՒՆԱ,¹³ ԽԱԶԱՏՈՒՐ/
ՄԽԻԹԱՐԻԶՔ ՏՎԱՔ ՅԱԽԱՆ ԶՊԱՏՈՎ Ի ՏԵՂԻՆ/
ՅԱԽԱՆԱՓՈՍԻ ՎԱՆՔՍ ԵՒ ԱՌԱՋՆՈՐԴ ՍՈՐԱ /
ՅՈՎԱՍՏՈՒՆ ԵՒ ՆԵՐՍԷՍ ՏՎԻՆ ՄԵԶ Ի ՄԱՐԴՆ
:Ա: ԺԱՄ Ի ՍԲ ԽԱԶԻՆ ՈՐ ԶԵԳԻՆ Ի ՎԱՆԻՑՍ ՀԱՆԷ ՅԱՅ ՆՁՈՎԵՍՑ[Ի]:

Այսինքն՝ Հայրավանքի Հովասափի եւ Ներսես առաջնորդները ոչ միայն իրենց եկեղեցում են նորոգումներ կատարել, այլեւ օժանդակել են հարեւանությունը գտնվող մեկ այլ՝ Հավանափոսի վանքում խորան կառուցելուն կամ նորոգելուն: Դրա համար միաբանության առաջնորդները Սարգսուկ եւ Բահր վարպետներին «Ի.»՝ քսան աշխատող են տրամադրել:

Գեղարքունիքում այդ եւ ավելի վաղ շրջանի հայ ճարտարապետության սյունյաց դպրոցի նշանավոր եկեղեցիներ, վանքեր, բազմաթիվ հոգեւոր հաստատություններ կառուցող, նորոգող՝ հիշելու արժանի շինարար շատ վարպետներ են եղել: Սակայն միայն Սարգիսուկի եւ Բահրի աշխատանքն է ուշագրություն արժանացել: Մյուս վարպետները հավանաբար ոչ պակաս մնայուն գործեր են թողել, որոնք առավել արժանի են մեծարանքի, սակայն, դժբախտաբար, նրանց անունները մնացել են անհայտության մեջ:

Հայրավանքի եւ Հավանափոսի վանքի նորոգման ծախսերը հոգացել են Վահրամ, Ստեփանոս, Միոնա(°), Խաչատուր եւ Մխիթա-

¹² Տե՛ս անդ, էջ 71:

¹³ Մենք փորձեցինք կարդալ գրեթե անհասկանալի այս փակգրի: Այս փակգրի «Մնուա» ընթերցումը կասկածելի է համարել նաեւ Ս. Բարխուդարյանը (Ս. ԲԱՐԽՈՒԴԱՐՅԱՆ, նշ. աշխ., էջ 70, ծանուցում):

րիչ այրերը, որոնք Հավանափոսի միաբանների գոյությունն եւ գործունեության պայմանները բարելավելու համար նրանց նվիրել են մի պարսպապատ ավան: Ահա այս օժանդակությանն է թերեւս նվիրված վերոբերյալ արձանագրությունը:

Բացի այս վիճագրից՝ Հայրավանքի եկեղեցու վրա կան նաեւ Համազասպի 1213 թվականի, նույն՝ ԺԳ. դարով թվագրվող Զահաբի, Մուծկանց Գրիգորի, Աբելի, Առաքելի, ինչպես նաեւ ԺԴ. դարի Օրբելյան Ինանիկ (Իվանե) եւ Բեշքեն իշխանների նվիրատվական արձանագրությունները¹⁴: Այսօր հրատարակված է վանքի, Հայրավանք գյուղի մատուռի եւ գերեզմանների տապանաքարերի եւ խաչքարերի 58 արձանագրություն՝ նախկինում հրատարակված հինգի փոխարեն¹⁵:

Մարդադավնյաց Սուրբ Նշան անունը Հայրավանքն ստացել է, որովհետեւ այստեղ պահվել է Քրիստոսի խաչափայտի սուրբ մասունքը: Վանքի այս անվանումը միաժամանակ ուղիղ աղերսներ ունի մի ժողովրդական ավանդության հետ, որը կապվում է Լենկ Թեմուրի՝ Հայաստան կատարած արյունալի արշավանքների հետ¹⁶:

Մենք կանդրադառնանք ավանդապատման՝ Մեսրոպ արքեպիսկոպոս Սմբատյանցի շարադրանքին, որը տեղ է գտել Գեղարքունիք գավառին նվիրված իր աշխատությունում:

Գրավելով Հայաստանի մեծ մասը՝ մոնղոլական զորքերը հասնում են Գեղարքունիք: Այստեղ Լենկ Թեմուրը հանդիպում է մի արտակարգ դեպքի: Նրան տեղյակ են պահում, որ Այրիվանքի առաջնորդը չափազանց հավատավոր եւ աղոթասեր վանական է: Ականատեսները պատմում են նաեւ, որ Աստծու զորութեամբ՝ առաջնորդը, վանքում պահվող Քրիստոսի խաչափայտի մասունքով ազուցված խաչը կապելով մեջքին, վազելով անցնում է Սեւանա լճի վրայով, հասնում Սեւանա կղզի: Հրաշքը պատմվում էր ամենուր: Վանահայր Հովհաննեսը տեսնելով, որ թշնամու զորքը մոտենում է վանքին եւ զգալով մոտալուտ վտանգը, ծնկաչոք

¹⁴ Ս. ԲԱՐՈՒԳԱՐՅԱՆ, նշ. աշխ., էջ 70–71:

¹⁵ Անդ, էջ 68:

¹⁶ Առաջին անգամ ավանդապատմին անդրադարձել են Ղազար Զահկեցին իր «Դրախտ ցանկալի»-ում (տե՛ս ՂԱԶԱՐ Ա. ԶԱՀԿԵՑԻ, Գիրք աստուածաբանական, որ կոչի Դրախտ ցանկալի, Կ. Պոլիս, 1795, էջ 672–673), ապա Միքայել Զամչյանը՝ «Պատմութիւն Հայոց»-ում (տե՛ս ՀԱՅՐ ՄԻՔԱՅԷԼ ՎՐԻ. ԶԱՄՉԵԱՆՅ, Պատմութիւն Հայոց, հտ. Գ. Վենետիկ 1786, էջ 888–882), որոնք ավանդապատմին վայրը համարում են Այունիքը, իսկ ըստ Սարգիս եպիսկոպոս Զալալյանի՝ ավանդապատման վայրը Սեւանա լճի ավազանում է (տե՛ս ՍԱՐԳԻՍ ԵՊՍ. ԶԱԼԱԼԵԱՆ, նշ. աշխ., էջ 13):

աղոթքով դիմում է Ամենակարողին՝ աղերսելով փրկել միաբաններին եւ շրջապատի գյուղերի հավատավորներին: Բռնակալը ցանկանում է տեսնել այդ հավատավորին եւ կատարել նրա բոլոր ցանկությունները: Մեծ խոստումներ է տրվում վանահորը՝ գանձեր եւ փառք: Սակայն ճգնավոր սուրբ այրը մերժում է դրանք՝ փոխարենը խնդրելով կյանք շնորհել իր հոտին: Լենկ Թեմուրը համաձայնում է՝ պայմանով, որ վարդապետն իր առողջության եւ երկարակեցության համար աղոթի: Դրա փոխարեն բռնակալը խոստանում է այնքան հավատավորի կյանք շնորհել, որքան եկեղեցում կտեղավորվի: Հովհաննես վանահայրն սկսում է աղոթքը, որն ուղեկցվում է եկեղեցի մարդկանց հուքով: Բավական ժամանակ է անցում, եւ Լենկ Թեմուրը նկատում է, որ մարդկանց շարժումը դեպ եկեղեցի չի դադարում: Նրա ուղարկած զինվորները, մտնելով եկեղեցի, տեսնում են, որ զարմանք, հավատացյալներն աղավաղված թեւեր առած թռչում են Սեւանավանքի ուղղությամբ եւ փրկվում օրահաս վտանգից¹⁷:

Քրիստոսի խաչափայտի մասունքով այս խաչը դեռ երկար ժամանակ շարունակում էր մնալ վանքում: Տեղի միաբանության փակումից հետո այն տեղափոխվել է Սեւանավանք եւ մինչեւ ժԹ. դարի վերջը պահվում էր Սուրբ Առաքելոց եկեղեցում¹⁸:

Հայրավանքում նպաստավոր պայմաններ կային վանական միաբանության մենաստանային հոգեւոր կյանքի եւ գործունեության համար: Ամենայն հավանականությամբ՝ այստեղ եղել է վարդապետարան, որի սաներն ընդօրինակել են ձեռագիր-դասագրքեր, որոնք պահվել են գրապահոց-մատենադարանում:

Հայրավանքից մեզ հասած առաջին ձեռագիրը 1530 թ. մի Ավետարան է, որն ընդօրինակվել է Հայաստանի համար դժնդակ ժամանակներում՝ «...ի հայրապետութեան տէր Գրիգորի... յերկիրս Գեղամայ, ի Սուրբ ուխտս որ կոչի Հայր Յոհան, ի դառն եւ ի նեղ ժամանակի [յորում] եկն յերկիրս մեր տաճիկ մի հարկ խնդրէր ոչ համարաւք, այլ թաւարուք,

¹⁷ ՄԵՍՐՈՊ ԱՐՔ. ՍՄԲԱՏԵԱՆՅ, նշ. աշխ., էջ 443. Մեսրոպ արք. Սմբատյանցն այս նույն դեպքերին տալիս է գուտ հոգեւոր արժեւորում իր մեկ այլ՝ «Նկարագիր Սուրբ Կարապետի վանից Երնջակայ եւ շրջակայից նորա» աշխատանքում (Տփլիս, 1904, էջ 18): Ավանդապատումն իր գեղարվեստական արտացոլումն է գտել Հովհ. Թումանյանի «Աղավաղվանքը» բալլադում. (տե՛ս ՀՈՎՀ. ԹՈՒՄԱՆՅԱՆ, Երկերի ժողովածու, հտ. Ա., Երեւան, 1969, էջ 297–299): Այս ավանդապատման ժԸ.–Ի. դարերի տարբեր գրառումների տարբերակման, թումանյանական եւ արդի գրականագիտական մոտեցման քննության մանրամասները տե՛ս Վ. ԴԵԻՐԻՎՅԱՆ, Թումանյանը եւ հայոց հոգեւոր ավանդույթը, Երեւան, 2010, էջ 36–52:

¹⁸ ՄԵՍՐՈՊ ԱՐՔ. ՍՄԲԱՏԵԱՆՅ, նշ. աշխ., էջ 136–137:

որ է հարկ բեռին»։ Դժբախտաբար մեզ է հասել միայն ձեռագրի այս հիշատակարանի համառոտ ընդօրինակությունը¹⁹։

Հաջորդ ձեռագիրը, որը հասել է մեզ եւ պահվում է Մաշտոցի անվան Մատենադարանում, էջմիածնի տեսուչ Սիմեոն վարդապետի պատվերով ընդօրինակված մատյան է։ Այն բովանդակային առումով հետաքրքիր ժողովածու է, որի մեջ մտնող բոլոր նյութ-միավորներն ընդօրինակվել են տարբեր գրչակենտրոններում։ Այդ ձեռագրի ընդօրինակումն ավարտվել է 1648 թ.։ Նշենք, որ ձեռագրի ընդօրինակմանը մասնակցել է նաեւ պատվիրատուն։

Ձեռագրի նյութերից մեկի՝ «Մեկնութիւն վեցօրէից արարչութեանն» ընդօրինակությունը կատարվել է «...յաշխարհս Պարսից մերձ ի յԱսպահան արքայանիստ քաղաքին, ի գեղաքաղաքին Նոր Զուղայոյ, ի մենաստանի Ամենափրկիչ վանացն...», իսկ մյուսի՝ «Գիրք հոգեացն եւ հրեշտակացն»-ի ընդօրինակումը՝ «...ի... Աթոռոյս էջմիածնիս, ձեռամբ Թաթէոս դպրի»՝ Սիմեոն վարդապետի աշակերտի։

Երրորդը մեզ հետաքրքրող ընդօրինակությունն է՝ Պետրոս Արագոնացու «Գիրք մոլութեան» եւ «Գիրք առաքինութեան» գործի, որ «Գրեցաւ յերկիրս Գեղամայ, ի գաւառիս Մազազայ, ընդ հովանեաւ վանացս, որ կոչի Հայր Յոհանավանք, ձեռամբ Յովհանիսի դպրի»²⁰։

Ժողովածուի վերջում եղած հիշատակարանը հաղորդում է նաեւ ձեռագրի ստեղծման այլ մանրամասներ։ Պատվիրատու Սիմեոն վարդապետը մեծ ցանկություն է ունեցել «Մոլութիւնքի» բնագիրն ունենալու։ Ձեռք բերելով գործի գաղափար օրինակը՝ նա սկսել է ընդօրինակել, սակայն ստիպված է եղել դադարեցնել ընդօրինակությունը, երբ նկատել է, որ գաղափար օրինակը հեռու է կատարյալ լինելուց. թարգմանությունն ունեցել է անճշտություններ եւ սխալներ։ «Արդ, ես՝ Սիմեոնս, ցանկայի բազում ժամանակաց Գրոցս Մոլութեան եւ կամէի մատամբ իմով գրել, որպէսզի ուղղեցից ըստ քերթողութեան արհեստին, քանզի թարգմանիչք սորա ոչ գիտելով զարուեստ քերականութեանն, ոչ կարացին ուղղակի թարգմանել, որպէս յայտ է հրմտացելոցդ, որք ընթեռնուք զսա»։ Իմանալով, որ գործի կատարյալ օրինակներից մեկը պահվում է Հայր Հովհաննու վանքում՝ հանձնարարել է Հովհաննես դպրին ընդօ-

¹⁹ ՀԱՅՐ ՂԵՐՈՆԻ ԱԼԻՇԱՆ, նշ. աշխ., էջ 141։ Ձեռագիրը պահվել է Փոքր Հալքի Տիվրիկ քաղաքում։

²⁰ ՄՄ Հմր 4064, էջ 421ա։

րինակել այն: Որքան էլ ցանկանար իր ձեռքով խմբագրել եւ ավարտին հասցնել գործը, Սիմեոն վարդապետն զբաղվածության եւ առողջական խնդիրների պատճառով չի կարողացել կատարել իր ցանկությունը: Այնուամենայնիվ, վարդապետը հույսը չի կորցրել, որ կսրբագրի եւ ավարտուն կդարձնի գործը. «...եթէ կարացից, սրբագրեցից, եւ թէ ոչ՝ անմեղադիր լերուք»²¹: Կիսակատար մասերն իր ցուցումով լրացրել է Թաթեոս գրիչն էջմիածնում:

Մեր ուսումնասիրությունը ցույց տվեց, որ ժողովածուի «Գիրք մոլութեան» եւ «Գիրք առաքինութեան» գործի սկիզբն օրինակել է Հովհաննես դպիրը՝ երկայուն գրությունամբ: Նրա գիրը համաչափ է, գեղեցիկ: Դրան հաջորդում է Թաթեոս գրչի միասյուն բոլորգիրը: 125ա էջից նորից Հովհաննես դպրի համաչափ գիրն է, որով եւ ավարտվում է ձեռագիրը: Հովհաննես դպիրն է զարդագրել նաեւ նկարազարդ էջերը: Ամբողջ ձեռագիրը միջին չափերի է, գրված է թղթի վրա՝ միասյուն եւ երկայուն գրությամբ: Գիրը բոլորգիրն է: Ձեռագրի կազմը եւս գրչության ժամանակի է:

Հայրավանքում է, հավանաբար, 1652 թ. ավարտին հասել Մովսես եւ Հակոբ երեցների Սյունյաց Ապահեն գյուղում սկսած «Շարակնոց»-ը: Ձեռագիրն այժմ պահվում է Մատենադարանում (Հ^մ 1626): Այն փոքր չափերի է, գրված է միասյուն բոլորգրով, նկարազարդ է, ունի «Աւետումն Յովակիմայ եւ Աննայի» պարականոն, ինչպես նաեւ տերունական՝ «Յարութեան» նկարները, կիսախորաններ, գլխազարդեր:

«Շարակնոց»-ն սկսել է Մովսես երեցը (էջ 1ա—169բ), շարունակել եւ նրան օգնել է Հակոբ գրիչը. «Ո՛վ դասք սուրբ երամից, յորժամ ընթեռնուք սուրբ գիրքս, զանարժան Յակոբ երէցս յիշեցէք, որ ի «Նորոգեալ կղզիք»էն մինչ Վարդավառի երկրորդ աւուր, Տէր յերկնից ի յետի տունն [գրեցի]» (էջ 169բ—250բ): Այնուհետեւ ընդօրինակությունը շարունակել է Մովսես երեցը եւ ավարտել «Շարակնոց»-ը (էջ 250բ—405 բ) Մարդադավնյաց Սուրբ Նշան վանքում:

Ավարտելով ձեռագիրը՝ Մովսես երեցը շարադրում է գլխավոր հիշատակարանը, որի վերջին մասը չի պահպանվել: Զի պահպանվել նաեւ «Շարակնոց»-ի գրչության վայրի հիշատակությունը: Ընդհանրապես հիշատակարաններում գրիչներն իրենց անձի մասին շատ քիչ տեղեկություններ են հաղորդում: Սակայն Մովսես գրչի ձեռագրի բավական եր-

²¹ ՄՄ Հ^մ 4064, էջ 421ա:

կար գլխավոր հիշատակարանում գրիչը գրում է. «...եմք բնական ի յերկրէն Ղափանայ, ի միւս յերկրէն Ծագածորոյ, ի գեղջէն Գորիսոյ»²²:

Մի ավագակային հարձակման պատճառով Մովսէս Երեցն ստիպւած էր թողնել հայրենի եզերքն ու հաստատուել Այունյաց մի այլ գավառում՝ Ծարում՝ Ապահեն գյուղում: Այստեղ էջմիածնի Փիլիպպոս եւ Աղվանից կաթողիկոսների հայրապետութիւնների տարում Դադիվանքի եւ Մարգարավնյաց Սուրբ Նշանի առաջնորդ Ստեփանոսի ձեռքով ձեռնադրուի է քահանայ: Գրիչն առանձնակի սիրով է խոսում Ստեփանոս արքեպիսկոպոսի մասին, որի կողքին նա հավանաբար շարունակել է գրչական աշխատանքը՝ կատարել ընդօրինակութիւններ: Բավական փորձառու է Մովսէս գրիչը ձեռագրերի ընդօրինակման՝ գրչութեան արվեստի եւ մանրանկարչութեան մեջ, եւ ինչպէս վկայում է անավարտ հիշատակարանը, նա նաեւ «Շարականոց»-ի կազմողն էր. «Ի թուականութեանս Հայոց ՌՃԱ. (1652) գրեցաւ, ծաղկեցաւ եւ կազմեցաւ Նղանակաւոր տառս ձեռամբ»²³:

Ժամանակին այս ձեռագրին իր՝ Գեղարքունիքին նվիրված աշխատանքում անդրադարձել է Մեսրոպ արք. Սմբատյանցը: Խոսելով Հայրավանքի ձեռագրական ժառանգութեան մասին՝ նա նշում է. «...Գրվել է այստեղ (Հայրավանքում.— Ա. Ղ.) եւ Շարականն յամին 1652 (ՌՃԱ.), ի Մովսէս երիցէ, ի հայրապետութեան Տեառն Փիլիպպոսի»:

Սակայն արքեպիսկոպոսի երկրորդ այցելութեան ժամանակ վանքի մատենադարանում ձեռագիրը չի եղել, եւ Մեսրոպ արք. Սմբատյանցը ցավով փաստում է. «Այսպէս եւ շատ գրեանք, որք գտնուի են զանազան տեղեր կամ վատ մարդկանց ձեռքով կորել, անյայտացել են»²⁴: Հնարավոր է, որ այդ ընթացքում տուժած լինի նաեւ «Շարականոց»-ի գլխավոր հիշատակարանը: Ամենայն հավանականութեամբ՝ Հայրավանքի ձեռագրերի ցուցակը կազմելիս Մեսրոպ արք. Սմբատյանցը «Շարականոց»-ի գլխավոր հիշատակարանը տեսել է ոչ թե թերի, այլ ամբողջական տեսքով եւ այդ իսկ պատճառով համարել է, որ այս ձեռագիրը գրվել է Մարգարավնյաց Սուրբ Նշան վանքում:

Այսինքն՝ ըստ Մ. Սմբատյանցի կազմած ձեռագրացուցակի՝ այդ ձեռագիրը գրվել եւ ավարտվել է Մարգարավնյաց Սուրբ Նշանում եւ ոչ թե

²² ՄՄ ՀՊ 1626, էջ 405բ:

²³ ՄՄ ՀՊ 1626, էջ 406բ:

²⁴ ՄԵՍՐՈՊ ԱՐՔ. ՍՄԲԱՏՅԱՆՑ, նշ. աշխ., էջ 444:

Սյունիքի Ապահեն գյուղում, ինչպես կարծում են Մաշտոցի անվան Մատենադարանի «Մայր ցուցակ ձեռագրաց»-ը կազմողները²⁵:

Մարդաղավնյաց Սուրբ Նշանը Հայրավանքն է, քանի որ աղբյուրներում այդ անունով մեկ այլ վանք չի հիշվում ո՛չ Սյունիքում, ո՛չ Արցախում, իսկ Հայրավանքն այս անունով հիշվում է մինչև ժԹ. դարը:

РЕЗЮМЕ

Айраванк известен также как монастырь отца Иоанна, монастырь Айри-ванк, Мардагавнеатс Сурб Ншан. Это один из самых известных монастырей Гегаркуникской области. В источниках нет сведений о строительстве монастырского комплекса, о культурной деятельности монахов. Впервые этот монастырь упоминается в колофонах 1530 года. Сейчас от монастырского комплекса сохранились только церковь и притвор, архитектура и литографии которого изучены. В статье мы даем новое прочтение литографии. Также изучены названия монастыря, особенно имя Мардагавняц Сурб Ншан, о котором есть свидетельства в колофонах, а также известна одна легенда.

SUMMARY

Hayravank is also known as Monastery of Father Hovhannes, Ayrivank Monastery, Mardagavneats St. Neshan (Holy Cross) Monastery. This is one of the most famous monasteries of Gegharkunik. The sources do not contain information about the construction of the monastic complex; there is no information about the cultural activities of monks, either. This monastery was first mentioned in colophons of 1530. Now only the church and the narthex have survived from the monastic complex, the architecture and lithographs of which have been studied. In this article, we present a new lithographic decrypt. We have also studied the names of the monastery, especially the name Mardagavneats St. Neshan, about which there is a legend and evidence in the colophons.

²⁵ «Մայր ցուցակ հայերէն ձեռագրաց Մաշտոցի անվան Մատենադարանի», հտ. Ե., Երեւան, 2009, կազմեց՝ Օ. Եղանյան, էջ 681: